

**Uunga siunnersuut: Greenland Oil Spill Response A/S pillugu Inatsisartut inatsisaata atorunnaarsinneqarnissaa pillugu Inatsisartut inatsisaat**

(Aatsitassanut Inatsisillu Atuutsinneqarnerannut Naalakkersuisoqarfimmut Naalakkersuisuni ilaasortaq)

**Saqqummiussinermut allakkiaq**

(Aatsitassanut Inatsisillu Atuutsinneqarnerannut Naalakkersuisoqarfimmut Naalakkersuisuni ilaasortaq)

**Siullermeenera**

Naalakkersuisut sinnerlugit matumuuna Greenland Oil Spill Response A/S pillugu Inatsisartut inatsisaata atorunnaarsinneqarnera pillugu Inatsisartut inatsisissaannut siunnersuut saqqummiunneqarpoq.

Uuliamik mingutsitsinermut upalungaarsimaneq, uuliamik mingutsitsinermik akiuiniarneq, uuliamik mingutsitsinerup kingorna avatangiisini saliineq aammalu Kalaallit Nunaanni aatsitassanut suliaasaqarfiup iluani tamatumunnga assingusumik suliaqarneq pillugit niuerneramik tunngavilimmik suliffeqarfimmik ingerlatsinissaq Greenland Oil Spill Response A/S-imut siunertaavoq. Ingerlatseqatigiiffik aamma tamanna ingerlatseqatigiiffiup malittarisassaanni allassimappat, Kalaallit Nunaanni suliaasaqarfiit allat iluanni taamatut suliaqarnermik ingerlatsinnaavoq, aammalu Kalaallit Nunaanni aatsitassanut suliaasaqarfiup iluani uuliamik mingutsitsinermik upalungaarsimanermik pilersitsinermut, ingerlatsinermut piorsaanermullu peqataasinnaalluni, ilanngullugit sungiusarnerni iliuuseqarluni peqataasarnertit, takukkit Greenland Oil Spill Response A/S pillugu Inatsisartut inatsisaanni § 1, imm. 4 aamma 5.

Taamaalilluni Greenland Oil Spill Response A/S-ip atuuffissaa pingaarneq tassaavoq uuliaarluernermut atatillugu mingutsitsinermik akiuiniarnissaq, aammalu ikummatissiassanut akuersissut malillugu pisinnaatitsissummik pigisaqartut ingerlatseqatigiiffimmut aningaasaqarnikkut tapersiinnissamut pisussaaffeqarput.

Annertunerusumik uuliaarluernissap aarlerinaateqarnera sinerissap avataani uuliasiorluni misissugassanik qillerinernut qalluinernullu attuumassuteqarpoq. Sinerissap avataani misissuinissamut qalluinissamullu ikummatissiassanut akuersissutinik ingerlatsivigineqartunik soqanngilaq, aammalu Kalaallit Nunaannut tamarmut ikummatissiassanut akuersissutinik tunniussinissaq pillugu tamanut ammasumik qinnuteqaqqusinissaq (neqeroortitsineq) unitsinniarlugu Naalakkersuisut ulloq 24. juni 2021-mi aalajangerput.

Taamaalilluni sinerissap avataani ikummatissiassanik misissuinissamut qalluinissamullu akuersissutinik atuuttoqanngimmat, aammalu akuersissutinik nutaanik sunniussisoqartussaannngimmat, ingerlatseqatigiiffiup uuliamik mingutsitsinermik akiuiniarnissamik siunertaqartup atuutsiinnarnissaa tunngavissaqarsorineqarunnaarpoq.

Taamaattorli ikummatissiassanit misissuillunilu qalluinernut naleqqiullugu najoqqutaasunut allanut tunngatillugu uuliamik mingutsitsinermik akiuinissamut upalungaarsimaffiup attatiinnarnissaa suli kissaatigineqarpoq, taamaattumillu ingerlassami allami ingerlatseqatigiiffiup pigisai nalillit ingerlataalu ingerlateqqinneqassapput.

Greenland Oil Spill Response A/S pillugu Inatsisartut inatsisaata atorunnaarsinneqarnerata kingunerisaanik ingerlatseqatigiiffiup atuutsiinnarnissaanut Naalackersuisut pisussaaffeqarunnaassapput, aammalu ingerlatseqatigiiffiup atorunnaarsinnissaanik naggateqartitsisumik ingerlatassamik aallartisaasoqarsinnaalissaaq. Piviusuni ingerlatseqatigiiffiup pigisai nalillit ingerlataalu Namminersorlutik Oqartussat pigisaattut ingerlatseqatigiiffimmut allamut nuunniarneqassapput (siunnersuutip saqqummiunnera sioqqullugu SIKUKI-lu isumaqatiginninniartoqarsimavoq), tamatuma kingornatigut ingerlatseqatigiiffinnut inatsisilerinikkut malittarisassiat tamakku najoqqutaralugit ingerlatseqatigiiffik atorunnaarsinneqarsinnaalluni.

Naggasiutigalugu inatsisissatut siunnersuummut, tassungalu atasutut oqaaseqaatinut innersuussissaanga.

Taamatut oqaaseqarlunga Naalackersuisut sinnerlugit siunnersuut Inatsisartunut suliassanngortippara.